

三才圖會

三才圖會

雲間元翰父王圻編集

男思義校正

人物十一卷

張道陵

蕭史

梅福

黃初平

費長房

藍采和

麻衣子

麻姑仙

呂巖

孫登

左慈

韓湘子

曹國舅

許遜

葛玄

何仙姑

張果老

黃野人

司馬承禎

王質

陶弘景

裴航

孫思邈

譚峭

許宣平

張志和

軒轅集

陳搏

雷本

馬湘

張栢端

李鼻涕

爾朱洞

葛長庚

陳楠

莫月鼎

馬鈺

張三丰

張道陵



張道陵字輔漢子房八世孫漢光武建武十年生於天目山七歲通道德經河洛圖緯之書志在修煉弟子有王長者相與煉龍虎大丹丹成真人年六十餘餌之若三十許人人北嵩山遇繡衣使者告曰中峯石室藏上三皇內文黃帝九鼎太清丹經得而修之乃昇天也於是真人齋戒七日得丹書精思修煉能分形散影每泛舟池中誦經堂上隱几對客杖藜行吟一時並起人皆莫測西城房陵間有白虎神好飲人血每歲其鄉殺人祭之真人召其神戒之遂滅又梓州有大蛇時吐毒霧行人中毒輒死真人以

法禁之不復爲害順帝壬午歲老君授以正一盟威秘籙
三清衆經九百三十卷符籙丹竈秘訣七十二卷雌雄劍
二把都功印一枚真人領訖日味秘文按法遵修時有八
部鬼帥各領鬼兵暴殺萬民真人奉老君誥命佩盟威秘
籙群鬼滅影而遁遷鶴鳴山彼處有妖當往除之遂書一
符化爲金翅鳥向湫上盤旋毒龍驚舍湫而去遂得鹹泉
十二神女各出一玉環來獻真人投此環于井中神女競
解衣入井爭取玉環真人遂掩之民至今不懼神女之害
太上元始天尊諭真人以正一盟威之法使世世宣布爲

人間天師仍密諭飛昇之期於雲臺峰白日昇天

蕭史



三才圖會

人物十二卷

五

蕭史得道好吹簫秦穆公以女弄玉妻之遂教弄玉吹簫
作鳳鳴有鳳來止其屋公爲作鳳臺後弄玉乘鳳蕭史乘
龍共昇天去

梅福



梅福字子真壽春人仕漢爲南昌尉見王莽專政嘆曰生
爲我酷刑爲我辱知爲我毒身爲我桎梏遂棄家求仙遍
遊雁蕩南閩諸山至仙霞山遇空同仙君授以內外丹法
謂福曰汝緣在飛鴻山福遂往結菴修煉丹成復還壽春
一日紫霧浮空金童玉女捧詔控鳶下福拜詔辭家乘鳶
而去人見福於宋元豐間封壽春真人

黄初平

三才圖會

卷八 人物十一 采芝

七



黃初平晉丹谿人年十五牧羊遇道士引至金華山石室中四十餘年其兄初起尋之不獲後遇道士善卜起問之曰金華山中有一牧羊兒初起卽往見初平問羊安在曰在山東往視之但見白石磊磊初平叱之石皆成羊初起亦棄妻子學道後亦成仙

費長房



費長房汝南人曾爲市掾有老翁賣藥于市懸一壺於肆頭及市罷輒跳入壺中市人莫之見惟長房於樓上觀之異焉因往再拜翁曰子明日更來長房旦日果往翁乃與俱入壺中但見玉堂殿麗吉酒甘般盈衍其中共飲畢而出翁囑不可與人言後乃就長房樓上曰我仙人也以過見責今事畢當去子寧能相隨乎長房心欲求道而念家人爲憂翁知之乃斷一青竹使懸之室後家人見之長房也以爲縊死遂殯殮之長房立其傍而衆莫之見於是費翁入山踐荊棘於羣虎之中留使獨處長房亦不恐又

長房於空室以朽索懸萬斤石於其上衆蛇竟來齧索欲斷長房亦不移翁還撫之曰子可教也復使食糞糞中有三蟲臭穢特甚長房意惡之翁曰子幾得道恨於此不成奈何長房辭歸翁與一竹杖曰騎此任所之頃刻至矣至當以杖投葛陂中長房乘杖須臾來歸自謂去家適經旬日而已十餘年矣卽以杖投陂顧視則龍也家人謂其死久驚訝不信長房曰往日所葬竹杖耳乃發塚剖棺杖猶存焉遂能醫療衆病鞭笞百鬼又嘗食客而使使至宋市鮮須臾還乃飯桓景嘗學于長房一日謂景曰九月九日

汝家有大災可作絳囊盛茱萸繫臂上登高山飲菊花酒
禍可消景如其言舉家登山夕還見牛羊雞犬皆暴死焉

藍采和



藍采和不知何許人常衣破藍衫六銖黑木腰帶闊三寸
餘一脚着靴一脚跣足夏則衫內加絮冬嘗卧雪中氣出
如蒸每於城市乞索持大拍板長三尺餘醉而踏歌老少
皆隨着之似狂非狂歌詞率爾而作皆神仙意人莫之測
得錢則用繩穿施之而行或散失亦不顧或贈貧者或與
酒家周遊天下人有自兒童時見之者及班白見之顏狀
如故後於濠梁酒樓上飲酒聞有笙簫聲忽然乘鶴而上
擲下靴衫腰帶拍板冉冉而去

麻衣子



麻衣子姓李名和生而紺髮美姿稍長厭世穢腐遂入終南山忽遇一道者授以道秘戒之曰南陽之間湍水之陽有靈山堂岩洞其旁神開汝鄉汝則往之可以翕神于蒼茫麻衣往求之遇樵者導其處居洞中十有九年晉義熙間大旱居民張爽率衆請雨麻衣以無術答之請者不輟是夕有少年十二人謂麻衣曰若再請但許之麻衣怪而諾之翌日果大雨十二人復來拜曰吾屬龍也上帝以師道業成令輔師行化耳劉宋大明初年百有一歲儼坐而尸解

麻姑仙人



麻姑仙人王方平之妹漢桓帝時方平降蔡經之家曰汝當得度世但汝氣少肉多未能卽上天當作尸解乃告以要言而去經後忽身發熱如火三日肉消骨立入室以被自覆忽然失其所在視其被中但有形如蛇蛻後十餘年忽還家語家人曰七月七日王君復來當作酒數百斛以待其日方平果乃遣人迎麻姑年可十八許坐定自進行厨擗鱗脯器皆金玉麻姑手似鳥爪蔡經私念背痒時得此爪搔之佳方平鞭經背曰麻姑神人也汝謂其爪可搔背痒耶方平去麻姑亦辭去

呂洞賓

三才圖會

人物十二卷



呂巖字洞賓號純陽子始在襁褓馬祖見曰此兒骨相不凡自是風塵物外後遊廬山遇火龍真人傳天遁劍法唐會昌中兩舉進士不第遊長安酒肆見一羽士曰吾雲房先生因與同憩肆中雲房自爲執炊洞賓忽就枕昏睡夢以舉子赴京狀元及第始自郎署擢臺諫翰苑秘閣兩娶富貴家女生子婚嫁蚤畢幾四十年又獨相十年權勢薰炙偶被重罪籍沒家資分散妻孥流于嶺表一身孑然立馬風雪中方興浩嘆恍然夢覺炊尚未熟雲房笑吟曰子適來之夢升沉萬態榮悴千端五十年間一瞬耳得不足

喜喪不足悲世有大覺而後知人世一大夢也洞賓感悟
遂拜雲房求度世術雲房子試洞賓皆無所動乃携洞賓
至鶴嶺悉傳以上真秘訣又以靈寶秘法及靈丹數粒示
洞賓洞賓既得雲房之道兼火龍真人天遁劍法始遊江
淮試靈劍遂除蛟害隱顯變化四百餘年常遊湘潭岳鄂
及兩浙汴譙間人莫知識自稱回道入宋政和中官中有
祟白晝見形盜金寶妃嬪上精齋虔禱奏詞凡六十日晝
寢見東華門外有一道士碧蓮冠紫鶴氅手持水晶如意
揖上曰臣奉上帝命來治此祟卽召一金甲丈夫捉祟勞


而啗之且盡上問丈夫何人道士曰此乃陛下所封崇寧
真君關羽也因問張飛何在羽曰張飛爲臣累劫世世男
子身今已爲陛下生於相州岳家矣上問道士姓名道士
曰臣姓陽四月十四日生夢覺錄之知其爲洞賓也其神
通妙用不能盡述後岳穆武父果夢張飛託世故以飛命
名云

孫登



孫登字公和於汲郡北山上窟中住夏則編草爲裳冬則披髮自覆善長嘯好讀易鼓一絃琴性無喜怒嵇康從之遊三年問其所圖終不答將別謂曰先生竟無言乎登曰子識火乎火生而有光而不用其光果然在於用光人生而有才而不用其才果然在於用才故用光在乎得薪所以保其耀用才在乎識真所以全其年康又請學琴登不教之曰子才多識寡難克于今之世矣後康果遭呂安事在獄爲詩自責云昔慚下惠今愧孫登登竟白日昇天

左慈



左慈字元放廬江人明六甲能使鬼神坐致行厨變化萬象曹操召見閉一室斷穀暮年出之顏色如故操嘗晏賓曰今日高會所少松江鱸耳慈因求銅盆貯水以竿釣之卽得鱸操曰恨無蜀薑慈曰易得操恐近取卽曰前使買錦可報增二十段慈曰諾乃擲杯空中化鶴而去須臾袖中出薑後買錦者回果云是日得報增錦操惡欲殺之慈乃卻入壁中或逢慈於湯城山頭遂奔入羊羣一老羝屈前兩膝人立而言曰遽如許使欲取之而羣羊數百皆變爲羝並人立云遽如許亦莫知取焉

韓湘子

三才圖會

人物十二卷

十七



韓湘子字清夫韓文公猶子也遇純陽因從游登桃樹墮
死而尸解來見文公因作詩見志有解造逡巡酒能開頂
刻花等句公卽爲開樽果成佳醞復聚土無何開碧花一
朶花間擁出金字一聯云雲橫秦嶺家何在雪擁藍關馬
不前公讀之不解他日公以極諫佛骨事謫官潮中途中
遇雪俄有一人冒雪而來乃湘也曰公能憶花間句乎公
詢其地卽藍關遂與湘宿藍關傳舍湘辭去出藥一瓢與
公曰服一粒可以禦瘴公愴然湘曰公不允卽西且當復
用公曰此後復有相見之期乎湘曰前期未可知也

曹國舅

三才圖會

人物十一卷

十八



曹國舅宋太后弟也因其弟每不法殺人深以爲耻遂隱跡山巖精思玄理野服葛巾經旬不食一日遇鍾離純陽二仙問曰聞子修養所養何物對曰養道曰道何在舅指天曰天何在舅指心二仙笑謂曰心卽天天卽道子親見本來面目矣遂授以還真秘術引入仙班

許遜



許遜字敬之號真君南昌人吳赤烏二年母夢金鳳銜珠
墜於掌上翫而吞之因是有娠而生真君尅意爲學尤嗜
神仙修煉之術聞西安吳猛得丁義神方乃往師之悉受
其秘買一鐵燈檠視之金也明日訪售王還之晉武帝太
康元年辟爲旌陽縣令歲饑民無以輸真君乃以靈丹點
瓦礫成金令人潛瘞於縣圃一日籍民之未輸者使服力
於圃民鋤地得金用以輸納歲大疫死者十七八真君標
竹於郭外置符水於其中使就竹下飲之皆瘥嘗有女童
五人各持寶劍來獻真君知其劍仙也卒獲神劍之用偶

趙真靖見鄉民盛烹宰以祀神真君曰怪祟敢爾乃召風雷伐之拔其林木又見人苦遠汲乃以杖刺社前涸澤出泉以濟之海昏有巨蛇爲民害真君飛步踏其首以劍劈其額曰大蛇雖滅蛟精未誅恐其俟隙潰郡城迹其所之乃在郡城江許化黃牛卧沙磧之上真君剪紙化黑牛往鬪之奔入城南直至長沙化爲人入賈玉使君之家先是蛟精嘗慕王之美女化爲一美少年謁之玉愛其才乃妻以女居數載生二子真君尋蹤至此蛟精計窮遂見本形爲吏兵所誅二子亦皆爲小蛟併誅之真君復還豫章而

蛟之餘黨盡化爲葫蘆冬瓜浮之滿江真君以劍授施岑
履水斬之悉無噍類由是水妖屏迹城邑無虞王敦舉兵
內向真君與吳君郭璞俱見問曰予夢一木破天君等以
爲何如真君曰非佳兆也吳君曰木上破天未字也公宜
未可妄動敦色變令璞筮之璞曰無成敦怒令武士擒璞
斬之真君乃舉杯擲地化爲白鵲飛繞梁棟敦一舉目已
失二君所在後欲買舟至豫章而舟人告以乏刺舟者真
君默召二龍挾舟而行二君各乘一龍以歸舊隱孝武寧
康二年拔宅昇天雞犬亦隨百里之內異香芬馥經月不散

葛孝先



葛玄字孝先丹陽句容人號曰葛仙公從左慈受丹液仙
經嘗與客食嗽口中飯盡成大蜂數百集客身有間玄張
口蜂皆飛入嚼之是舊飯也能指石人使行指蝦蟆及諸
昆蟲燕雀之屬歌舞絃節皆如人狀或宴客冬設生瓜棗
夏致冰雪無人傳杯杯自至前如酒不盡杯不去也百姓
思雨書符著社中俄頃大雨偶行遇一神廟凡過者離百
步下車否則有警仙公書一符令從者投廟中廟屋自焚
過武康見一人家病作請巫祀妖邪仙公勅五伯拽妖邪
頭附柱鞭背出血流地妖邪伏罪乃止過華陰見一士人

溺于蛇精仙公禁而斬之卽以一符與士人服卽瀉下蚯蚓蝦蟆之類無數遂得全生嘗在荊門軍紫蓋山修煉值天寒大凍仙公跣足衣衫襤褸時有屈家二女偶見憐之黃夜促成雙履次日獻之仙公已去但存爐灰尚溫二女撥灰得丹一粒姊妹分而服之自後神氣冲冲不飢不渴時人咸謂得仙矣嘗從吳主各船行至三江口遇風船多漂沒仙公船亦不知所在踰宿忽見仙公水上步來旣至尚有酒態謝曰昨伍子胥強邀留飲是以淹屈陛下嘗于西峯石壁上石臼之中搗藥遺墜一粟許有飛禽遇而食

之遂得不死至今月白風清之夜其禽猶作丁當杵臼之
聲名曰搗藥鳥仙人琴高聞仙公得道自東海跨雙鯉來
訪仙公與之酣飲既醉高卧白雲間酒醒雙鯉化爲石矣
仙公贈以雙鶴跨之而還嘗有客從仙公泛舟仙公卽取
一符投水中逐水而下復取一符投之逆水而上復取一
符投之卽不上不下須臾上符下符會于中流良久收之
又于水濱見鬻大魚者魚已死矣以丹書紙納魚口中投
于水躍然而去如此神異不能盡述

何仙姑



何仙姑廣州增城縣何泰女也生而頂有六毫年十四五
夢神人教曰食雲母粉當輕身不死因餌之遂誓不嫁常
往來山谷其行如飛每朝去暮則持山果歸遺其母後漸
辟穀武后遣使召赴闕中路復失去景龍中白日昇仙天
寶九載見于麻姑壇立五色雲中大曆中又現身于廣州
小石樓

張果老



張果隱於恒州中條山往來汾晉間常乘一白驢日行數萬里休息時折疊之置于巾箱中乘則以水喫之復成驢善息氣累日不食數飲酒上賜之酒辭曰小臣飲不過二升有一弟子可飲一斗明皇令召之俄頃一小道士自殿簷飛下賜酒飲及一小斗果辭曰不可更賜過度明皇因逼賜之醉酒從頂上涌出冠衝落地忽化爲金樁上狩咸陽獲一大鹿果曰昔漢武帝元狩五年上林獲此鹿乃放之以銅牌誌於左角下遂命驗之果有銅牌二寸許但文字凋落耳天寶初明皇遣使徵果果聞輒卒弟子塋之

黃野人



黃野人葛洪弟子洪棲山煉丹野人常隨之洪既仙去留丹于羅浮山柱石之間野人得一粒服之爲地行仙後有人遊羅浮宿石巖間中夜見一人無衣而紺毛覆體意必仙也乃再拜問道其人了不顧但長笑數聲聲振林木復歌曰雲來萬嶺動雲去天一色長笑兩三聲空山秋月白其人歸道其形容卽野人也

司馬承禎



司馬承禎字子微事潘師正傳辟穀導引之術遍遊名山
唐睿宗迎至京帝問其術對曰身猶國也游心於淡合氣
於漠與物自然而無容私焉則天下治帝嘆咏曰廣成子
之言何以加此辭歸天台盧藏用指終南山曰此中大有
佳處何必天台對曰以僕觀之是仕宦之捷徑爾盧初隱
終南後登庸聞言殊有慚色一日謂弟子曰吾今爲東華
君所召必須往俄頃化去如蟬脫弟子塋其衣冠焉時年
八十有九有修真祕旨坐忘論等書行於世

王質




王質晉衢州人入山伐木至石室山見石室中有數老人圍棋質置斧觀之老人以物如棗核與質令含咽其汁便不覺饑渴且告云汝來已久可還質取斧柯已盡爛矣質亟歸家已數百年親舊無復存者復入山得道人徃徃見之

陶弘景

三才圖會

人物十一卷



三

陶弘景字道明秣陵人十歲見葛洪神仙傳晝夜研尋謂人曰仰青雲覩白日不覺爲遠矣及長身長七尺七寸神儀明秀朗目疎眉耳各有七十餘毛出外二寸許右膝有數十黑子作七星文讀書萬卷善琴棋工草隸弱冠齊高帝作相引爲諸王侍讀雖在朱門閉影不交外物惟以披閱爲務永明十年脫朝服掛神武門上表辭祿詔許之乃止于句容之茅山立館號曰華陽隱居徧歷名山尋訪仙藥每經澗谷必坐卧其間吟詠盤桓不能已特愛松風庭院皆植松每聞其嚮欣然爲樂有時獨遊泉石望見者咸

以爲仙人及梁武禪代弘景援引圖讖數處皆成梁字令
弟子進之武帝恩禮愈篤屢加禮聘並不就惟畫兩牛一
牛散放水草之間一牛着金籠頭有人執繩以策驅之武
帝笑曰此人欲數曳尾之龜豈可復致國家每有大事無
不咨之 時謂山中宰相其弟子桓闓得道將昇天弘景
問曰某行教修道勤亦至矣得非有過尚淹延在世乎乃
托闓訪之闓昇天後還謂弘景曰師之陰功極著但所修
本草多用蠶虫水蛭之類功雖及人亦傷命物以此一紀
後方解形拂世爲蓬萊都水監耳弘景復以草木之藥可

代物命者著別行本草三卷以贖其過一日無疾自知應
逝逆筭亡日仍作告逝詩大同二年卒時年八十五顏色
不變屈伸如常香氤氳日氣氤滿山

裴航



裴航唐長慶中書生因下第遊于鄂渚謁故舊崔相國相國贈錢二十萬遂挈歸于京因傭巨舟載於襄漢過藍橋遇老嫗以孫女雲英妻之入玉峯洞中瓊樓珠室而居之餌以絳雪瓊英之丹體漸清虛毛髮紺綠神化自在超爲上仙至太和中友人盧顥遇之於藍橋驛之西備說得道之事乃贈藍田美玉十斤紫府雲丹一粒顥稽顙請曰兄旣得道乞一言惠教航曰老子云虛其心實其腹顥猶懵然復語之曰心多妄想腹漏精液虛實可知也言訖忽不見

孫思邈



孫思邈華原人七歲日誦千言及長好談老莊隱於太白山學道鍊氣養神求度世之術洞曉天文精究醫藥務行陰德隋文帝徵爲國子博士不就至唐太宗召始詣京師永徽三年年已百餘歲一日沐浴衣冠端坐謂子孫曰吾今將遊無何有之鄉矣俄而氣絕月餘顏色不變及入棺唯空衣焉

譚峭



譚峭字景升幼而聰敏文史涉目無遺獨好黃老仙傳一
旦告父母出遊終南山師嵩山道士十餘年得辟穀養氣
之術常醉遊夏則服烏裘冬則衣布衫或卧風雪中人謂
已斃視之氣休休然頗似風狂每行吟曰線作長江扇作
天靱鞋拋在海東邊蓬萊信道無多路只在譚生拄杖前
後居南嶽煉丹丹成服之後遂仙去

許宜平



許宣平新安歙縣人唐睿宗景雲中隱於城陽山南塢結
菴以居時負薪賣於市擔上常掛一花瓢携曲竹杖每醉
吟騰騰以歸至懿宗咸通十二年許明恕婢入山採樵一
日獨於南山中見一人坐石上曰我卽明恕之祖宣平也
汝歸爲我向明恕道我在此山中乃遣婢隨樵人歸婢覺
樵擔甚輕到家具言入山逢祖翁宣平明恕恕婢呼祖諱
取杖擊之其婢隨杖身起不知所逝

張志和



張志和字不同唐金華人母夢楓生腹上而生肅宗擢明
經賜名志和命待詔翰林後親喪不復仕遨遊江湖自號
煙霞釣徒又號玄真子垂釣不設餌志不在魚也飲酒三
斗不醉守真養氣卧雪不寒入水不濡每酒酣鋪席水上
獨坐而酌席來去如舟俄有雲鶴旋遶其上遂跨鶴而昇

軒轅集



軒轅集不知何許人相傳數百歲顏色不老坐暗室目光
長數丈每採藥於岩谷則毒龍猛獸隨之若爲衛護居常
人家請齋者雖百處皆分身而至與人飲酒則袖出一壺
纔容二升賓客滿座傾之彌日不竭自飲百升不醉遇病
者以布巾拂之應手而愈宣宗召入問長生可致不答曰
絕聲色薄滋味哀樂一致德施無偏自然與天地合德日
月齊明況長生久視乎久之辭還山命中使送之每見其
於一布裘內探錢施人比至江陵已施數十萬取之不竭
未及至山忽亡所在

陳搏



陳搏字圖南號扶搖子亳州真源人初生不能言至四五歲戲澗水水濱有青衣媼引置懷中乳之卽能言敏悟過人及長經史一覽無遺梁唐士大夫挹其清風得識其面如覩景星慶雲然先生皆莫與交唐明宗親爲手詔召之先生至長揖不拜明宗待之愈謹以宮女三人賜先生賦詩謝曰雪爲肌體玉爲腮多謝君王送得來處士不興巫峽夢空煩雲雨下陽臺遂遯去隱武當山九石巖服氣辟穀凡二十餘年復移居華山時年已七十餘矣常閉門卧累月不起周世宗顯德中有樵於山麓見遺骸生塵迫而

視之乃先生也良久起曰睡酣奚爲擾我後世宗召見賜號白雲先生一日乘驢遊華陰聞宋太祖登極拍掌太笑曰天下自此定矣太祖召不至再召辭曰九重仙詔休教丹鳳銜來一片野心已被白雲留住太宗初年始赴召惟求一靜室乃賜居於建隆觀扃戶熟寐月餘方起辭去賜號希夷先生一日遣門人鑿石室於張超谷旣成先生往造之曰吾其歸於此乎遂以左手支頤而終七日容色不變肢體尚溫有五色雲封谷口彌月不散年一百八歲太宗聞先生善相人遣詣南衙見真宗及門亟還問其故曰

斯役皆將相也何必見王於是建儲之議遂定先生以易
數授穆伯長穆授李挺之李授邵康節以象學授种放放
授盧江許堅堅授范諤至今糟粕猶存也

雷隱翁



雷隱翁名本少磊落不羣既長業進士再試卽棄去默坐終日或謂其癡翁笑曰終不以吾癡易汝黠一日以術授其子遂出遊不返宋元祐間有朝士遊羅浮山見翁坐於樹下自吟一絕云徃徃來來三十年更無踪跡落人間功成行滿昇天去回首山頭月正圓

馬自然



馬湘字自然好經史工文學嘗與道侶徧游方外至湖州醉墮雪溪經日而出衣不沾濕言爲項羽相召飲指溪水令逆流指柳樹令隨水走來去指橋令斷復續人或疾告者自然無藥但以竹拄杖打患處或以杖指之口吹杖頭作雷鳴便愈後歸省兄兄適出謂嫂曰特歸與兄分此宅我惟愛東園耳待兄三日不歸遽卒明日兄歸感慟曰弟學道多年是歸托化以絕望耳乃棺歛遂窆之東園明年東川奏梓潼縣道士馬自然白日上昇詔杭州發其棺只一竹杖而已

張栢端



張栢端天台人宋熙寧二年遊蜀遇劉海蟾授金液還丹
火候之訣乃改名用成字平叙號紫陽嘗有一僧修戒定
慧能入定出神數百里間頃刻卽到與紫陽雅志契合一
日紫陽曰禪師今日能與遠遊乎僧曰可願同往揚州觀
瓊花可折一花爲記少頃欠伸而覺紫陽曰禪師瓊花何
在禪師袖手皆空紫陽乃拈出瓊花與僧把翫元豐五年
夏趺坐而化住世九十九歲弟子用火燒化得舍利千百

李昇涕



李鼻涕宋紹聖初劉延仲寓秀州嘗有道人過門忽從求藥則以鼻涕和垢膩爲丸與之病立効因自號李鼻涕延仲延之坐曰今日適無酒爲禮道人笑曰床頭珍珠泉一尊何不出以待客劉大慚呼童取尊道人曰不必取但將空尊來尊至索紙覆之少焉香溢於外成美酒矣坐者皆醉明日劉有他客出所謂珍珠泉者而尊中無涓滴矣一日詣劉別云後二十年某月某日當於真州相見至期劉卒於真州

爾朱洞



爾朱洞字微通少遇異人傳還元抱一之道因自號歸元子初隱蓬山後賣藥蜀漢間行動如飛洞賣丹藥有某太守欲買之曰太守金多非一百二十萬不可太守以爲狂言惑衆命納之竹籠沉於江中至涪陵上流二魚人乘舟而漁舉網出之乃洞也二漁人曰視子類有道者亦有所傳乎二漁曰我昔從海上仙人得三一之旨煉陽修陰亦有年矣洞於是索酒與劇飲取丹分餌之至荔枝園中二人昇雲而去

葛長庚



葛長庚宋瓊州人母以白玉蟾名之應夢也年十二應童子科後隱居于武夷山號東瓊子事陳翬虛九年始得其道蓬頭跣足一衲弊甚喜飲酒未見其醉博洽儒書出言成章雷印常佩肘間祈禳則有異應時言休咎驚省聾俗嘗在京都遊西湖至暮墮水舟人驚尋不見迨旦則玉蟾在水上猶醺然也一日有持刀追脅者玉蟾叱其人刀自墮而走玉蟾招之曰汝來勿驚以刀還之宋嘉定中詔徵赴闕對御稱旨命館太一宮一日不知所往後每往來名山神異莫測

陳楠



陳楠字南木號翠虛博羅人以盤櫬槥桶爲生後得太乙
刀圭金丹法於毘陵禪師得景霄大雷琅書於黎姥山神
人能以符水捻土愈病時人呼之爲陳泥丸時披髮日行
四五百里褊衣百結塵垢滿身善食犬肉終日爛醉嘗之
蒼梧遇郡禱旱翠虛執鉄鞭下潭驅龍須臾雷雨交作過
三山大義渡洪流舟不敢行翠虛浮笠而濟行欽管道中
遇羣盜拉殺之瘞三日盜散復甦遊長沙衝帥節執拘送
邕州獄數夕又回長沙矣中夜坐或含水銀越宿成白金
以丹法授白玉蟾

莫月鼎

三才圖會



莫月鼎諱洞一字起炎湖州人入青城山丈人觀見徐無
極受五雷之法於是月鼎自名雷師驅使鬼魅動與天合
時嬉笑怒罵皆若有神物從之者賣餅師積餅於筐時被
精怪竊去月鼎召雷轟雪市斬猢猻首于市一人娶婦半
路爲白猿精所攝至門但空車焉月鼎禹步如有指麾狀
狂風忽作飄婦云適在北高峯何以忽然至此七十三歲
一日屬其徒王維華曰明年正月十三日將化於汝家及
期風雲雨雷電交作索筆作偈書畢泊然而逝顏面如丹

馬鈺



馬鈺寧海人孫仙姑其妻也號丹陽子自終南來訪之云
宿有仙契欲西遊鈺未能輒棄家業重陽多方點化鈺念
始決孫仙姑在家結菴修煉二十餘年一日鈺謂門人曰
今日當有非常之喜輒歌舞自娛俄聞空中樂聲仰見仙
姑乘雲而過仙童玉女旌節儀仗擁導前後俯而告鈺曰
先歸蓬島待君也於是夜坐談將二鼓風雷大雨震動遂
東首枕肱而逝

張三丰



張三丰遼東懿州人名君實字玄玄生有異香龜形鶴骨
大耳圓目身長七尺鬚髯如戟頂作一髻手持刀尺一笠
一衲寒暑御之不飾邊幅人目爲張獺獨日行千里靜則
瞑目旬日所啖斗升輒盡或辟穀數月自若也元末居寶
雞金臺觀留頌辭世而逝土人楊斬山置棺殮訖臨窆發
視之復生召入蜀洪武初至太和山修煉結菴於玉虛宮
菴前古木五株嘗栖其下久則猛獸不距鷲鳥不搏人益
異之後入武當常語鄉人云茲山異日當大顯於時居二
十三年拂袖遊方而去